

古 今 事 物 考

古今事物考卷五

禮儀

祭祀 王子年拾遺記曰庖羲氏使鬼物以致羣祠以犧牲登薦百神則祭祀之始也

壇壝 書武王有疾周公爲三壇同壝黃帝內傳乃有築壇壝事是爲其制起自黃帝

木主 說文曰宗廟之木名曰祏曲禮曰措之廟立之主曰帝蓋廟所以藏主始爲廟卽立主也

版位 宋詔王欽若脩製郊立天地版位貯以漆匣昇床覆以黃縑帕壇上四位以朱漆金字卽今之神位版也

木像 仙傳拾遺曰黃帝臣左微因帝昇天乃刻木爲帝  
狀率諸侯而朝之此刻木像人之初也

金像 史記曰范蠡相越句踐旣雪會稽之恥乃乘扁舟  
泛五湖越王思之鑄金爲像則金人始于句踐也漢世  
匈奴休屠王乃有祭天金人後世以銅鐵鑄佛像自句  
踐始也

齋戒 黃帝內傳曰帝誓翦蚩尤乃齋三日以告上帝此  
齋戒之始也國朝洪武三年令禮部鑄銅人一高一尺  
五寸手執牙簡如大祀齋戒則書致齋三日中祀致齋  
二日于簡上太常寺進置于齋所五年令諸衙門各置

木齋戒牌刻文曰國有常憲神有鑒焉凡遇祭祀則設之

祝文 記云伊耆氏始爲入蜡乃有祝文其文曰土反其宅水歸其壑昆蟲毋作草木歸其澤是也漢董仲舒有祝日食文亦本於此

封禪 史記曰封泰山禪梁父者七十二家無懷氏爲之始蓋在太昊前也管子亦云遁甲開山記則太昊之後自女媧無懷凡十五代乃在太昊後炎帝前也

郊祀 通典曰黃帝封禪天地則郊丘之始也黃帝內傳曰帝築圓壇以祀天方壇以祀地則圓丘方澤之始也

漢武帝三歲一郊平帝立王莽改孟春正月上辛若丁  
天子親合祀天地于南郊後漢始定南北郊國朝于鍾  
山之陽建圓丘陰建方丘以冬夏至祀之奉仁祖配享  
十二年正月乃合祀于大祀殿丹墀內壘石爲臺東西  
相向爲日月星辰四壇又於內壝之外以次爲壇二十  
亦東西相向爲五嶽五鎮四海四瀆風雲雷雨山川太  
歲天下神祇歷代帝王諸壇後奉太祖配享永樂十八  
年北京天地壇成洪熙元年奉太祖太宗並配享嘉靖  
九年詔建圜丘于南郊以每歲冬至行大報禮方澤于  
北郊以每歲夏至行祭地禮仍于孟春行祈穀禮于上

帝二郊俱奉我太祖配神祈穀仍奉太祖太宗同配

日月壇 舜典禋于六宗傳云王宮祭日夜明祭月也賈  
誼曰三代之禮春朝朝日秋暮夕月所以明有敬也唐  
制以二分日祀朝日夕月于國城東西國朝洪武初于  
大祀殿丹墀內壘石爲臺東大明壇西夜明壇郊祀日  
命官分獻嘉靖九年築朝日夕月二壇于東西郊乃于  
春秋二分日遣官祭之

明堂 尸子曰黃帝曰合宮有虞曰總章商曰陽館周曰  
明堂通典曰黃帝拜祀上帝于明堂唐虞祀五帝于五  
府夏后享祖宗于世室商人曰重屋周人宗祀文王于

明堂以配上帝漢時公孫玉帶畫黃帝明堂圖則明堂要自黃帝始也

配天 有虞爲禘郊之禮以祀昊天上帝始有配食之事  
祭法有虞氏禘黃帝而郊饗是也虞以土尚德用有德者夏商稍用其姓代之先後至周公郊祀后稷以配天宗祀文王于明堂以配上帝蓋配天侑食肇于有虞而明堂之嚴父配帝則自周公始也

宗廟 沿革曰唐虞五廟夏后因之至商而七謂三昭三穆與太祖之廟七也周兼文武二祧故九廟洪武九年於南京闕左始建太廟其制前爲正殿後爲寢殿俱翼

以兩廡寢殿九間一間爲一室中一室奉安德祖東一  
室懿祖西一室熙祖東二室仁祖西二室高廟永樂遷  
都北京建廟東三室奉安文廟西三室仁廟東四室宣  
廟西四室英廟而九廟已備其後以次遞爲祧祔嘉靖  
十五年詔曰朕乃創昭穆羣廟以祀祖宗彰太祖爲當  
專尊之主復作太宗廟于羣廟之外表祖功宗德之不  
遷以享百世之祀更皇考廟曰獻皇帝廟別擇吉區以  
避渠道大功悉成遂定五歲大舉禘祭之禮于太廟以  
祀皇初祖而奉太祖配焉每特享祖宗以立春于本廟  
夏秋冬皆合享于太廟循時祔之典季冬仍修大祔禮

于太廟皇考止修四時之祀以避豐禡之嫌

廟號 王者祖有功宗有德始自有虞祖顓頊而宗堯商以太甲爲太宗太戊爲中宗武丁爲高宗始列宗廟之號故漢因之西京有太宗世宗東京有顯宗肅宗而唐乃例稱之蓋其事原于虞舜而備于商人也

禘祫 大傳曰禮不王不禘春秋文公二年大事于太廟公羊傳曰大事祫祭也黃氏曰禘追祭其所自出故爲追享祫羣主皆朝于太祖而合食故爲朝享國朝弘治元年始建祧廟于寢殿後奉藏懿祖神主及儀物于中每歲暮復奉懿祖神座于正殿之左居熙祖之上行祫

祭之禮

奉先殿 國朝以太廟時享未足展孝思之誠復於宮內建奉先殿朝夕致敬朔望行禮時節獻新忌辰致祭社稷 禮記曰社祭土而主陰氣稷爲五穀之長左氏曰共工氏有子曰勾龍爲后土實始爲社烈山氏之子曰柱能植百穀故祀爲稷湯爲旱遷柱以周稷代之故自湯以來皆祀之國初大社大稷異壇同墳洪武十年改建于午門外之右同壇同墳每歲春秋仲月上戊日致祭始罷勾龍后稷奉仁祖配後更奉太祖配永樂中北京壇成洪熙後始奉太祖太宗同配

山川 通典曰黃帝祭于山川典禮爲多則山川祀秩始

自黃帝氏也國初建山川壇于天地壇之西正殿七間  
每歲仲秋祭太歲風雲雷雨五嶽五鎮四海四瀆鍾山  
之神東西廡各十五間分祭京畿山川春夏秋冬四月  
將及都城隍之神永樂中北京建壇位置陳設制同南  
京惟正殿鍾山之右添祭天壽山之神

五祀 世本曰商湯作五祀戶井竈中雷行至周而七曰

門行厲戶竈司命中雷也國朝孟春宮內祭司戶之神  
孟夏光祿寺祭司竈之神俱內官行禮季夏土旺後戌  
日奉天殿外文樓前西向祭中雷之神司禮監官行禮

孟秋午門前祭司門之神孟冬宮內祭司井之神俱內  
官行禮歲暮太廟西廡下東向合祭五祀太常寺官行  
禮

籍田 周制天子春秋躬耕籍田禮記武王耕籍田然後  
諸侯知所以敬

先農 漢文制春始耕于籍田官紀先農以一大牢則其  
祀由漢興也國朝太祖每親祭先農遂耕籍田初以后  
稷配神又改配仁祖後不設配位止遣應天府致祭列  
聖登極初行耕籍禮則親祭每歲以仲春上戊日遣官  
致祭

先蠶 西陵氏之女嬪祖爲黃帝元妃始教民育蠶治絲繭以供衣服後世祀焉先蠶周禮內宰詔王后蠶于北郊齋戒享先蠶

旗纛 國朝旗纛藏之內府每歲仲秋祭山川日遣旗手衛指揮祭于山川壇內之旗纛廟霜降日又祭于教場歲暮享太廟日又祭于承天門外永樂後別有神旗之祭專祭火雷之神每月朔望神機營提督官請祭于教場內又洪武禮制各處守禦官俱於公廨後築臺立旗纛廟設軍牙六纛神位春祭用驚蟄日秋祭用霜降日釋奠 禮記曰凡學春官釋奠于先師秋冬亦如之蓋周

制也漢代以來釋奠先師唯享仲尼

先師孔子 唐玄宗追謚孔子爲文宣王宋真宗加至聖元加大成國朝監前代瀆禮之失既詔嶽鎮海瀆與城隍之號其歷代忠臣烈士亦止依當時封號惟孔子封爵特仍其舊後四配十哲兩廡諸賢封爵亦仍舊不改每歲二丁傳制遣官致祭列聖登極皆遣官祭告闕里又駕幸太學行釋奠禮每月朔望遣內臣降香嘉靖間改正先師孔子配哲先賢

帝王廟 洪武初年始建歷代帝王廟于欽天山之陽略用同堂異室之制祭太昊伏羲氏炎帝神農氏黃帝軒

轅氏帝金天氏帝高陽氏帝高辛氏帝陶唐氏帝有虞氏夏禹王商湯王周武王漢高祖皇帝漢光武皇帝唐太宗皇帝宋太祖皇帝元世祖皇帝凡十六位皆開基創業有功德于民之主後復擇古名臣三十七人從祀兩廡東廡風后臯陶龍伯益傳說召公奭召穆公虎張良曹參周勃馮異房玄齡李靖李晟潘美岳飛木華黎博爾忽伯顏西廡力牧夔伯夷伊尹周公旦太公望方叔蕭何陳平鄧禹諸葛亮杜如晦郭子儀曹彬韓世忠張浚博爾木赤老溫皆用始終全節者每歲郊祀時既附祭歷代帝王秋八月復擇日遣官祭于本廟

配享 尚書盤庚告臣曰茲予大享于先王爾祖其從與  
享之則功臣配享之禮由商人始也

真武廟 宋會要曰天僖二年詔加真武靈應真君國朝

南京建北極真武廟北京建北極祐聖宮俱三月三日

九月九日太常寺官祭

功臣廟 國朝正殿中山武寧王徐達開平忠武王常遇

春岐陽武靖王李文忠寧河武順王鄧愈東甌襄武王

湯和黔寧昭靖王沐英東序都指揮使馮國用郢國公

僉都督耿再成西海武莊公僉都督丁德與濟國公都

督同知張德勝蔡國忠毅公靖海侯吳禎海國襄毅公

平章康茂才鄆國武義公副使茆成東海郡公西序參  
政胡大海越國武莊公都督趙德勝梁國公廣德侯華  
高巢國武莊公都督同知俞通海號國忠烈公江陰侯  
吳良江國襄烈公宣寧侯曹良臣安國忠烈公安陸侯  
吳復黔國威毅公副使孫興祖燕山忠愍侯四孟歲暮  
遣駙馬都尉祭若正旦清明中元孟冬冬至又別遣太  
常寺官祭

五嶽 唐中宗封西嶽爲金天王玄宗封泰山爲天齊王  
中嶽爲中天王南嶽爲司天王北嶽爲安天王宋真宗  
加號中嶽中天崇聖帝東嶽天齊仁聖帝南嶽司天昭